

Tabell 3-fk

Anslag på frie inntekter i 2022 for fylkeskommunane

Tabell 3 viser anslag på vekst i frie inntekter for fylkeskommunane frå 2021 til 2022. Som frie inntekter reknar ein inntektsskatt (inkl. naturressursskatt) og rammetilskot. Tabellen viser veksten etter anslag på rekneskap for 2021. Alle tala er i nominelle kroner. Prisveksten i kommunesektoren frå 2021 til 2022 er anslått til 2,5 prosent.

I skatteanslaget er anslaget for skatteutjamning inkludert. Skatteinntektene, inkl. skatteutjamning, er den storleiken det er knytt mest uvisse til når ein bereknar veksten i frie inntekter. Samla inntektsskatt for fylkeskommunane i 2021 og 2022 blir anslått av Finansdepartementet i statsbudsjettet for 2022. For å anslå skatteinntektene for kvar fylkeskommune, tek ein utgangspunkt i skatt per innbyggjar i fylkeskommunen i 2020 og skriv fram talet med innbyggjartalet i 2021. Ut ifrå skatt i 2020 framskriven med innbyggjartal for 2021, blir det rekna ut eit anslag for kvar fylkeskommune sin prosentdel av det samla skatteanslaget for 2021 og 2022. Dette trekkjer i retning av at fylkeskommunar som har høgare vekst i talet på innbyggjarar enn landsgjennomsnittet frå 2021 til 2022, òg får høgare vekst i skatteinntekta enn det som følgjer av føresetnadene for berekninga. Det motsette vil kunne vere tilfellet for fylkeskommunar med svakare vekst i talet på innbyggjarar enn gjennomsnittet for landet. Skatteutjamninga for 2022 tek utgangspunkt i innbyggjartalet per 1. januar 2021.

I berekninga av veksten i frie inntekter blir naturressursskatten halden på same nivå i 2021 og 2022. For begge åra blir det nytta tal for naturressursskatt frå inntektsåret 2019.

Rammetilskotet for 2021 er henta frå revidert nasjonalbudsjett 2021. Rammetilskotet for 2022 er vist i tabell 1-fk.

For å gjere tala samanliknbare, noko som er ein føresetnad for å kunne berekne veksten, blir anslaget på frie inntekter for 2021 korrigert for oppgåveendringar, regelendringar og innlemmingar av øyremerkte tilskot i 2022. Anslaget på frie inntekter for 2021 er òg korrigert for ekstraordinære løyvingar i samband med virusutbrotet. Desse løyvingane blir ikkje vidareførte i 2022. I 2022 er summen av korrigeringar for virusutbrotet og andre saker om lag -4,3 mrd. kroner i 2021-kroner. Korreksjonane er viste i innleiinga til Grønt hefte (i 2022-kroner).

Endringar i fordeling av saker med ei særskild fordeling (jf. tabell C-fk) er behandla som ei oppgåvekorrigering i utrekninga av vekstanslaget for kvar einskild fylkeskommune. For 2022 gjeld det distrikts- og regionalpolitiske tilskot, men òg fordeling av midlar til kompensasjon for reduserte ferjepriser, med særskilt fordeling i RNB 2021 og fordeling etter delkostnadsnøkkelen for båt og ferje i 2022. Ny fordeling av desse sakene påverkar ikkje det samla vekstanslaget for fylkeskommunane.

Veksten i frie inntekter frå 2021 til 2022 blir berekna frå anslag på rekneskap for 2021 i Prop. 1 S for 2022. Skatteinntektene for fylkeskommunane i 2022 er anslått til 38,6 mrd. kroner. Inntektsveksten

frå 2021 til 2022, ut frå anslag på rekneskap, er nominelt anslått til 1,9 prosent. Anslaget omfattar ein auke i skatteanslaget for 2021 med 831 mill. kroner samanlikna med anslaget i revidert nasjonalbudsjett 2021.

Skjønstilskot som blir fordelt i løpet av året i 2021 og 2022 er ikkje inkludert i vekstberekninga for kvar fylkeskommune. For begge åra er det ufordelte skjønet (reservepotten) på 50 mill. kroner. Kompensasjon som blei gitt gjennom skjønstilskot som følgje av covid-19-pandemien på samla 3 881 mill. kroner i 2021, er ikkje inkludert i vekstberekninga for kvar fylkeskommune.

Seks kommunar bytte fylke på tvers av dei nye fylkesgrensene frå 1. januar 2020. Sidan anslaget på naturressursskatt tek utgangspunkt i fordelinga av skatt før dei nye fylkesgrensene tredde i kraft, er det ved berekninga av skatteanslaget 2021 og 2022 korrigert for grensejusteringane med utgangspunkt i faktiske skattetal på naturressursskatten for 2019 for dei kommunane det gjeld.

Kolonne 1 – Anslag på frie inntekter i 2021

Kolonne 1 viser frie inntekter etter anslag på rekneskap for 2021. Rammetilskotet per fylkeskommune er henta frå revidert nasjonalbudsjett for 2021, mens skatteinntektene er framskrivne i samsvar med skatteanslaget for 2021 i Prop. 1 S (2021–2022). Kompensasjon som er gitt gjennom skjønstilskotet som følgje av covid-19-pandemien er inkludert i landssummen for 2021.

Kolonne 2 – Anslag på oppgåvekorrigerede frie inntekter i 2021

Inntektene i kolonne 2 er anslag på rekneskap korrigert for oppgåveendringar, regelendringar og innlemming av øyremerkte tilskot. Det er òg korrigert for ekstraordinære løyvingar i samband med virusutbrotet. Desse løyvingane blir ikkje vidareførte i 2022. Det er teke utgangspunkt i det same anslaget som i kolonne 1. Oppgåveendringane er omtalte nærare i innleiingsteksten til Grønt hefte og Prop. 1 S (2021–2022) for Kommunal- og moderniseringsdepartementet.

Kolonne 3 – Anslag på frie inntekter i 2022

Kolonne 3 viser anslag på frie inntekter i 2022. Rammetilskotet til fylkeskommunane, eksklusive skatteutjamninga, er henta frå kolonne 4 i tabell 1-fk. Skatteinntektene er framskrivne i samsvar med skatteanslaget for 2022 i Prop. 1 S (2021–2022).

Kolonne 4 – Anslag på korrigert vekst frå 2021 til 2022

Kolonne 4 viser anslag på oppgåvekorrigert vekst i frie inntekter frå anslag på rekneskap 2021 til 2022 for den einskilde fylkeskommune (kolonne 3 - kolonne 2).

Kolonne 5 – Anslag på korrigert vekst i prosent frå 2021 til 2022

Kolonne 5 viser prosentvis oppgåvekorrigert vekst frå anslag på rekneskap 2021 til 2022.